

CVIII.

*Le Prince d'Orange à Wesenbeke. Il l'assure de sa bonne affection. Bodleian libr. Mss. St. Amand 7 fol. 51.*

1571, le 1<sup>er</sup> Août.

Wesenbeke, J'ay receu diverses de voz lettres; et dernièrement celles du XXVij<sup>e</sup> du passé que par ce porteur exprès vous m'avez envoyé. J'ay veu toutes les particularitez contenues en icelles, et me desplaist extrêmement que voz affaires privez sont en l'estat que vous dictes. De tant plus que je ne voys présentement ainsi desnudé de tous moiens pour vous y secourir, comme j'en ay bien la volonté, pour la bonne affection que de tout temps je vous ay porté, laquelle aussi n'est en riens amoindrie, quoy qu'il samble vous en ayez des persuasions au contraire, lesquelles je ne me puis imaginer dont vous procédent, et avois plustost tousjours espéré que mectant à part vous en considération tout l'estat des affaires présentes, avecq le succès des passées vous vous en eussiez tenu quelque peu plus à repos en vostre esprit, sans vous donner ceste peine en attendant qu'il plaise à ce bon Dieu redresser ung jour tellement ces affaires que tous bons et fidelz serviteurs et zélateurs de sa cause, auront moiien d'y employer ung chacun le talent qu'il a receu de luy.

Quant à ce que par vostredicte dernière vous m'escripvez d'aucuns maronniers<sup>1</sup> qui doibvent venir icy pour obtenir de moy quelques passeportz, il est qu'on m'a fait rapport qu'ilz sont arrivez hier en ce lieu. J'entendray ce qu'ils me viennent dire, pour selon ce me régler, qui sera cause que je ne vous feray ceste plus longue, si ce n'est pour prier Dieu qu'il vous ayt éter-

<sup>1</sup> maronnier = charpentier. V. V. 101. J. 102. 103.

nellement en sa sainte garde. De Dillenberch ce  
premier jour d'Aoust 1571.

Vostre bon amy  
GUILLAUME DE NASSAU.

*A Mre Jacques de Wesenbeke  
Docteur en droict  
mon bon amy.*

R. 3 Augusti. Essenn resp. 7<sup>1</sup>.

